



Komunikadu Imprensa
Tribunál Distritál Dili
08 Fevereiru 2021

Prosedimentu kriminál extinge ba krime violasaun seksuál tanba preskrisaun

Iha 26 Janeiru 2021, Tribunál Distritál Dili prezide julgamentu no decide extinge prosedimentu kriminál ba kazu violasaun seksuál ne'ebé provadu envolve arguidu OS hasoru nia oan feto (*entiada*). Kazu ne'e tribunál arkiva tanba depoisde produsaun ba prova no alegasaun finál, tribunál haree hatak kazu ne'e liu ona prazu ba preskrisaun. Kazu ne'e akontese iha fulan Novembru 2001 no rezista iha Ministériu Públiku (MP) iha tinan 2010 maibé prokuradór titulár ba kazu ne'e konklui no haruka akuzasaun ba tribunál iha tinan 2019.

“JSMP konsidera situasaun ne'e grave teb-tebes no prejudika vítima tanba vítima tenke lakon nia direitu ba justisa. Bainhira sistema legál falla atu atua ho dilijénsia hodi fó justisa ba vítima, ida-ne'e impede vítima sira atu buka reparasaun através husi sistema justisa formal,” dehan Sra. Ana Paula Marçal, Diretora Ezekutiva JSMP.

Ministériu Públiku akuza arguidu kontra artigu 172 Kódigu Penál kona-ba krime violasaun seksuál ho moldura penal tinan 5 to'o tinan 15 no artigu 173 letra (a) kona-ba agravasaun konjuga ho artigu 2, 3, 35 no 36 husi Lei Kontra Violénsia Doméstika (LKVD).

Tribunál depoisde produsaun ba prova no alegasaun finál decide halo alterasaun ba kualifikasaun jurídika husi artigu 172, 173 letra (a) Kódigu Penál Timor Leste nian ba fali artigu 285¹ Kódigu Penál Indonézia nian tanba kazu ne'e akontese iha tinan 2001 no iha momentu ne'ebá sei uza hela Kódigu Penál Indonézia nian.

¹Barang siapa dengan kekerasan atau ancaman kekerasan memaksa seorang wanita bersetubuh dengan dia di luar perkawinan, diancam karena melakukan pemerkosaan dengan pidana penjara paling lama dua belas tahun.

Bazeia ba artigu 78 nú. 3² husi Kódigu Penál Indonézia nian define katak prosedimentu kriminal ba krime punivel ho pena prizaun aas liu tinan 3, sei extinge kuandu liu tiha tinan sanulu resin rua (12).

Relasiona ho alterasaun ne'e, JSMP observa katak kazu ne'e vítima rezista iha MP iha tinan 2010 bazeia ba nia Nú. Prosesu 2588/10.PDDIL no akuzasaun ba kazu ne'e tama ba iha Tribunál Distritál Dili (TDD) iha tinan 2019, signifika kazu ne'e atrazu iha MP durante tinan sia (9). Tribunál nia intervensaun ba prosesu julgamentu primeiru iha 11 Janeiro 2021 no konklui iha 26 Janeiro 2021. JSMP nia hanoin, fora husi prokuradór karik hasoru difikuldade balun maibé se iha momentu kazu tama iha MP iha tinan 2010 no prokuradór halo lalais akuzasaun maka sei la akontese preskrisaun tanba foin tama ba tinan sia (9) ka seidak liu tinan 12 no sei iha tempu mós ba tribunál hodi konklui kazu ne'e antes preskrisaun iha tinan 2013.

Entretantu kona-ba tempu entre akontesimentu no keixa iha MP, kuaze tinan 9, tuir JSMP ida ne'e akontese tanba dalaruma vítima iha situasaun ne'ebé hanesan ho vítima sira seluk hetan presaun husi família atu rezolve problema ne'e liuhusi sistema justisa informal, preokupa ho estigmatizasaun ka falta komprensaun kona-ba sistema justisa formal no nafatin iha persepsaun katak violénsia ne'ebé akontese iha uma laran ne'e nu'udar kestaun uma laran nune'e taka dalan ba vítima fetu no labarik fetu sira ka ema seluk la keixa ka halo denúnsia ba kazu violénsia seksuál.

Kazu ida ne'e, arguidu konfesa katak halo duni violasaun seksuál hasoru lezada nu'udar nia oan entiada to'o hahoris oan ida maski oan refere moris to'o de'it tinan ida. Ho nune'e, JSMP preokupa tebes no husu ba ministériu públiku nu'udar nain ba asaun penál ne'ebé ho kompeténsia halo akuzasaun no sustenta akuzasaun iha julgamentu atu bainhira simu keixa ka denúnsia tenke lalais halo akuzasaun nune'e la akontese tan preskrisaun liu-liu ba kazu sira ho natureza violénsia seksuál tanba vítima sira maski moris hela iha presaun no perigu nia laran maibé ho brani hakarak prosesa sira nia kazu. Sira fó ona konfiansa ba iha sistema justisa formal nune'e justisa formal iha dever atu hakonu direitu vitima sira asesu ba justisa.

Atu hetan informasaun kompletu, favór kontaktu:

Ana Paula Marçal
Diretora Ezekutiva JSMP
Email: ana@jsmp.tl

² (1) Kewenangan menuntut pidana hapus karena daluwarsa: ayat 3. Mengenai kejahatan yang diancam dengan pidana penjara lebih dari tiga tahun sesudah dua belas tahun;

Telefóne: 3323883 | 77040735
Website: <http://jsmp.tl>